

方技

術藝雖微分道之體蹈水識命壘坑察理口醫與卜起生知死下及博奕猶賢乎已巧不可階通神泣鬼如庖解牛進乎道矣志方技

唐

王寧字九齡西溪人少有異術能占陰陽吉凶屢中如神唐太宗嘗召入禁中官靈臺司少監

明

朱以仁西溪人精於醫永樂初為北京太醫院良醫正

東臺縣志

卷之三十一

方技

一

以上晏溪志

郭守教富安人精醫術屢獲奇效

夏厚字烟林本城人性瀟灑不治生產工畫擅名一時

嚴篤本城人精太素脈屢有奇驗全活多人

王鏘安豐人長於風角精推步以六壬數卜吉凶多奇

應壽八十三

劉思齊安豐人工醫有奇驗不計利三子皆遊於庠人以為陰德之報

梅時明安豐人少遇異人授秘術能續斷骨裹以膏輒愈四方來求治者不遠千里裔孫在山新華世其業

吳登龍安豐人工奕棋時梁梁有顧從者亦精此技術
更以博古聞

王民皞安豐人精太素脈與王天錫周咸善輩並稱時
醫

何崑梁梁人工醫診脈卜死生無不奇驗同里有王基
者亦精此術皆名噪於時

以上中十
場舊志

國朝

柳逢春字敬亭曹家莊人本曹姓年十五無賴名掛捕
籍亡走盱眙尋渡江休大柳下攀條泣然日嘻吾今
姓柳矣初挾稗官演義抵掌談市中已能傾倒市人

東臺縣志

卷之三十一

方技

二

後師雲間莫後光教其養氣定辭審音辨物揣摩而
談使聞者驩哈噓噓進而毛髮盡悚舌橋然不能下
又進而恂然若有見恤然若有亡天下莫能難也會
寧南侯左良玉與皖將軍杜宏域不協念非生莫能
解乃進之良玉良玉知其辯以長刀遮客引就席皆
震懼失次逢春索酒詼啁諧笑旁若無人良玉大驚
恨相得晚須臾不在左右則不懽而逢春善用權譎
爲人排難解紛及寧南敗逢春所攜千金隨手散盡
每被酒談寧南故事輒欬獻灑泣縱游吳越北至京
師公卿爭延致之逢春擊節抗談睥睨通顯無所詘

故率不得意落落貧困以卒祭酒吳偉業爲之傳康熙

徐應時安豐人博洽有隱德善琴音調高逸得古初遺

意且精通奇門皇極數以布衣終

康熙十場志

劉仲一字裕充安豐人幼失怙恃寄養於姑夫何信家因冒姓何何本世醫仲一初事舉子業崇禎末隱居東洵還治醫鍵戶十年博貫羣書遂爲名醫款門者不遠千里來日得百錢輒付酒家醉後卽杜門狂歌人呼爲癡先生有贈以多金者輒謝曰子非知我者也我豈爲利計哉同里吳嘉紀嘗贈以詩子良彪世

東臺縣志

卷之三十一

方技

三

其學

杜蟠字仙根工畫蘭竹得宋元家法次子鷗翥字勁秋爲人孤峭有父風亦工蘭竹晚年得足疾不輕作畫人得其片紙爭寶貴之

錢志儀字又宣嗜學工書尤通九章算術康熙閒纂修算學志儀與選事竣例授官不就爲人清介居京師二十年名公卿皆推重之與海陵太史陳厚耀交最篤著算法輯要惜散逸無存有詩名半舫集

釋慈門住本城彌陀寺工畫山水冠絕一時其徒雲瓢畫亦工法倪高士

宋致字寧遠號靜山從父之極泰州老畫師也自父秀公隸籍枿茶遂家焉致少孤力學善山水人物爲時所稱性耿介不計生產人或以塵事語之輒不答日惟賣畫以自給壽七十四

金恒傑字斗南何梁人庠生性孤傲嘗戴僧笠着朱履端拱行市中遇不平事輒怒詈之工刻印章石不佳輒擲地去人以美石潛置其側見之卽喜呼酒痛飲醉後運筆如飛俄頃成數十印富貴人求之不可得貧士再三索不拒也間有以敗釘鑄者更奇古可玩何顯祖本姓劉仲一裔孫字右臨安豐人五歲讀書一

東臺縣志

卷之三十一 方技

四

再過卽成誦見父兄與人奕從旁默會八九歲遂精奕理成童稱國手以布衣跌宕公卿間江南北無不聞其名者性介不妄取一錢弱冠喪妻遂不再娶

汪鳴岐安豐人精外科能治奇症乾隆三十六年有陳姓與人較刀傷腎囊兩罌丸出衆醫不能治鳴岐以藥敷之十餘日卽愈其餘奇驗甚多縣令王顏其額曰醫家之良

季莢字隱桐安豐人少習舉業家貧畫山水人物宗黃子久沈啓南工詩年七十六卒與里人虞庭友善虞庭得秘傳醫目疾神效施藥不取一錢好吟咏種竹

數百竿構樓其中顏曰竹香閣戶無妄交年七十九
卒著有竹香樓詩鈔以上
新增
太史公撰史記日者龜策皆爲之作傳而班孟堅
列九流有農圃醫卜蓋小道可觀不容盡廢矣茲
錄其尤者以著儒者遊藝之助云